

Una Sulat I Pedro

Una Basan

Ni libro igsulat i Pedro na disipulu i Jesu-Cristo na igsalin ébô mulit-ulit katô kagi din. Na, tô igsulat si Pedro kani sulat, tugál dán sikandin. Igpapid din ni una sulat tun ta mga ágpamaké ki Jesu-Cristo na ikatalap na góddô tun ta lima mga probinsya.

Tô mga ágpampamaké ikatalap su igirrayatan dan katô mga ñi ágbánnal ki Jesu-Cristo. Igpapid i Pedro ni sulat tun kandan ébô pabákkárrán din tô kapamaké dan, su tuu dan ágkahirapan katô mga ágkókitan dan tingód katô kapamaké dan ki Jesu-Cristo.

Igpapanámdám i Pedro kandan tô gimanan dan tingód katô kamatayan i Jesu-Cristo, asta katô kanté puman kandin, asta katô kalónód din. Su ka makatiis dan katô mga kérrayat, duwán madigár na matanggap dan tun ta kalónód i Jesu-Cristo. Igpapanámdám pagsik i Pedro kandan na kailangan nángngà tô ágkémun dan tun ta saruwan ka Manama, asta kailangan mánnal dan katô mga ágpangulu kandan.

1 ¹Sakán si Pedro na apostoles i Jesu-Cristo. Igsulatta tun ákniyu na igsalin katô Manama asta ikatalap na góddô tun ta mga probinsya ka Ponto, Galacia, Capadocia, Asia asta Bitinia. ²Taganá kód igsalin ukit katô kakalyag katô Ámmà Manama, asta iglinisan kód ukit katô Ugis Espiritu ébô mánnal kó ki Jesu-Cristo asta ébô kórasan tô salà yu ukit katô dipanug din.

Mólà pa ka tuu kéduwan tô Manama ákniyu, asta duwán kasunayan yu.

Duwán gimanan ta su inanté puman si Jesus

³Durungán tô Manama na Ámmà katô Áglangngagán ta na si Jesu-Cristo! su ukit katô tuu dakál kédu din igbággayan ki ikandin ka mantu

kantayan, asta duwán dán gimanan ta su inanté puman si Jesu-Cristo. ⁴Igtaganà ka Manama tô bággen din áknita na mga gabatà din. Igtagù tun ta langit tô tanggapán ta na di maróddóg, asta di kadattan, asta di mandà tô kadigárran. ⁵Ukit katô katulusan ka Manama, ágtómmóngan kó ikandin sippang ka tanggapán yu tô katábbusan tun ta tapuri álló ukit katô kapamaké yu kandin.

⁶Purisu kailangan kadayawan kó, agad maranu kó pa dógó tingód katô ássa-ássa mga kahirapan na inókitan yu. ⁷Duwán kahirapan yu áknganni su tô gó tô pagkinnam ébò pakitanán ka bánnal tô kapamaké yu. Kinnaman tô kapamaké yu iring katô bulawan na ágkinnaman asta áglinisan ukit ka apuy. Su tô kapamaké yu tuu pa dakál é lagà tun ta Manama ka tandingán katô bulawan na ágkandà. Purisu atin kumasarig tô kapamaké yu ukit katô kahirapan, duwán durung asta bantug yu tun ta álló ka pakitanán dán si Jesu-Cristo. ⁸Ágginawaan yu sikandin agad ándà kó ikakita kandin. Agad di kó ágkita kandin, asal ágbánnal kó kandin. Agad áknganni, tuu kó ágkadayawan katô dakál dayó na di ágkakagi, ⁹su tô katamanan katô kapamaké yu, tô gó matábbus kó.

¹⁰Duwán kakalyag katô mga propeta ka Manama sayyan na makasóddór tingód kani katábbus ka Manama. Agad igkagi dan tingód kani, asal ándà dan kagpátti ka ándin é kóbadan katô ágkagin dan. ¹¹Agad sikandan tô igpakagi katô Espiritu i Cristo tingód katô mga kérrayat ki Cristo asta tingód katô séllaán ka bantug na dumunggu kandin, asal ándà dan ikasóddór ka sadan manubui asta pamánnun ka katuman kani. ¹²Igpasóddór ka Manama kandan na tô katumanan ánnà para katô kandan sarili, asal para áknuyu áknganni. Ni gó tô Madigár Gulitán na igulit-ulit áknuyu ukit katô katulusan ka Ugis Espiritu na igpapid tikud tun ta langit. Agad tô mga panaligan ka Manama, duwán kakalyag dan na kagpáttan ni katábbus.

Kailangan ugis tô ágkémun ta

¹³Purisu taganà yu tô panámdám yu. Pasunnad kó katô sarili yu. Iman kó katô bággen áknuyu ka pakita dán si Jesu-Cristo. ¹⁴Bánnal kó katô Manama, su sikiyu tô mga gabatà din. Yakó yu ágnunugi tô madat kakalyag yu dángngan tô ándà kó pa ikasóddór katô kabánnalan. ¹⁵Asal agad ándin tô áglumun yu, kailangan pógis kó iring katô Ugis Manama na igtawar áknuyu. ¹⁶Su duwán igsulat tun ta kagi ka Manama, “Pógis kó su sakán ugis.”^a

¹⁷Tô “Ámmà” na Manama na ágdasalan yu, ándà ágmusingán din ka rumuud, su ágruud sikandin katô mga manubù tingód katô linumuwan dan. Purisu kailangan respetowan yu sikandin róggun katô kóddô yu

^a 1:16 Levitico 11:44-45

nit banuwa, ¹⁸su isóddóran yu na igtábbus tō Manama ákniyu ébō paluwaán kó ikandin tikud tun ta ágkémun katō mga kamónaan yu na ándà ágpulusán. Igtábbus kó ánnà ukit katō bulawan ó mapputi bulawan na ágkandà, ¹⁹asal igtábbus kó ukit katō mahal dipanug i Cristo na iring ka nati ka karnero na ándà palang bógók ó buring. ²⁰Sikandin tō igsalin katō Manama tō ándà pa imuwi ni banuwa, asal igpapid din sikandin nit banuwa ébō tumábbus ákniyu nit katapuriyan mga álló. ²¹Ukit ki Cristo igsarig kód katō Manama na iganté asta igpabantug kandin. Purisu Manama tō ágpamakén yu asta gimanan yu.

²²Igurasan dán tō salà yu ukit katō pagtuman yu katō kabánnalan, asta duwán dán gó ginawa yu para katō mga kataladi yu. Purisu paginawaé kó tikud tun ta tibuk pusung yu. ²³Ipamasusu kó puman ánnà tikud tun ta ákniyu ámmà asta innà, su tō kantayan na igbággé dan ákniyu sumippang dád ka kamatayan. Asal ni mantu kantayan na sumippang ka ándà ágtamanán igbággé ka Manama ukit katō kagi din na manté ka ándà ágtamanán. ²⁴Su mà katō kagi ka Manama na igsulat,

“Tō langun manubù iring na sigbát,

asta tō kadigárran ka bónnóng katō manubù iring na bulak ka sigbát,

su tō sigbát ágkalanás, asta tō bulak ágkómpad.

²⁵Asal tō kagi katō Áglangngagán dì mandà sippang ka ándà ágtamanán.”^b

Ni kagi ni tō Madigár Gulitán na igulit-ulit dán diyan ákniyu.

Pamasak kó katō kagi ka Manama

2 ¹Purisu tanani yu tō ringasa, tō bulaló, tō mà kagi ginawa, tō sabù, asta tō kagi na ágdadat katō unawa yu. ²Iring katō délák batà na ágpamasak ka dugsun katō kandin innà, pamasak kó katō kagi ka Manama na bánnal makanté katō espiritu yu ébō mássud tō kapamaké yu sippang ka tanggapán yu tō katábbusan, ³su bánnal isóddóran yu na madigár tō kédu katō Áglangngagán.

⁴Padani kó tun ki Cristo na iring na manté batu. Agad igélléyan sikandin katō mga manubù, asal igsalin sikandin asta dakál é lagà din tun ta Manama. ⁵Na, iring kó na manté mga batu na gamitán ka Manama tun ta templo na patindággán din para pangadapan kandin. Imun kó ikandin na mga parì na igsalin din ébō mággé katō kadurung asta kapangadap na tanggapán din ukit ki Jesu-Cristo. ⁶Mà katō kagi ka Manama na igsulat sayyan,

“Paminág kó kanak. Duwán sánnarán ku tun ta lunsud na ánggadanan Sion.”^c

^b 1:24-25 Isaias 40:6-8 ^c 2:6a Sion tō ássa ngadan ka Jerusalem.

Iring sikandin na batu na imun pónsadanán,
su igsalin ku asta dakál é lagà.

Asta tô mamaké kandin dì gó kayyaan.”^d

7Na, tun ákniyu na ágpamaké ki Jesus, dakál é lagà din. Asal tun ta mga dì ágpamaké kandin, mà katô kagi ka Manama,

“Duwán sábbad batu na igantug katô mga gimu ka balé,
su kéman dan ka ándà ágpulusán.

Asal ándà dan kasóddóri na tô gó tô batu
na tuu ágkailanganán katô balé.”^e

8Asta mà katô ássa kagi ka Manama na igsulat,

“Iring sikandin na batu na kasungkulan dan
asta gélléyan dan.”^f

Ikasungkul dan su ándà dan bánnal katô kagi ka Manama. Ni gó ni kakalyag katô Manama kandan.

⁹Asal sikiyu gó tô mga manubù na igsalin katô Manama, asta inému kó na mga parí na ágkasarigan taralumu katô Manama. Sikiyu tô manubù nit banuwa na igsalin asta igsakup ka Manama ébô mulit-ulit katô ágkasalábbuan mga áglumun katô Manama na igtawar ákniyu tikud tun ta kangittángngan asta igpasadun tun ta kandin makasalábbù kappawaan.^g

10 “Dángngan, ánnà kó mga sakup katô Manama,
asal áknganni sikiyu tô mga sakup din.

Dángngan, ándà yu tanggapi tô kédu din,
asal áknganni igtanggap yud tô kédu din.”^h

Madigár ágkémun katô mga gabatà ka Manama

11Na, mga ágginawaan ku, iring kó na ágróggun dád nit mga banuwa na góddóan yu. Purisu ágpédu-éduwa ákniyu na kailangan liliyan yu tô mga ágkadigárran katô lawa yu na ágdadat katô espíritu yu. ¹²Banté kó katô ágkémun yu agad ágbalát kó tun ta mga dì ágpamaké, ébô agad muyas dan ákniyu, asal kitanán dan tô madigár linumuwan yu asta durungán dan tô Manama tun ta álló ka rumuud sikandin.

¹³Bánnal kó katô langun opisyaales, su ni gó tô kakalyag katô Áglangngagán. Bánnal kó katô emperador na ágpangulun yu, ¹⁴asta katô mga opisyaales na igpapid din ébô sumupak katô mga áglumu ka madat, asta ébô dumurung katô mga áglumu ka madigár. ¹⁵Tô kakalyag ka Manama na ukit katô mga madigár áglumun yu, tumagnáp tô mga manubù na ágbuyas ákniyu asta ándà ikasóddór katô kabánnalan.

¹⁶Ánnà kó mga állang, su igpaluwà kód. Asal yakó yu ággamiti tô

^d 2:6b Isaias 28:16 ^e 2:7 Salmo 118:22 ^f 2:8 Isaias 8:14 ^g 2:9 Ahaán tô Isaias 43:20-21; Exodo 19:6 ^h 2:10 Ahaán tô Hoseas 1:6,9; 2:23

kaluwaan yu para pagtambun katô madat mga áglumun yu. Igpaluwà kòd ébô mému kó na mga ágsuguánnán katô Manama. ¹⁷Respetowi yu tô langun manubù, ginawayi yu tô mga kataladi yu tun ta kapamaké, kamáddangi yu tô Manama, asta respetowi yu tô emperador.

Palumun katô mga ágsuguánnán

¹⁸Sikiyu na mga ágsuguánnán, kailangan mánnal asta rumespeto kó katô ákníyu mga amo. Ánnà dád mga amo na médu-édu asta madigár tô bánnalán asta respetowan yu, asal tô mga amo pagsik na madat é ágkémun. ¹⁹Su atin ka makatiis kó katô kahirapan agad ágpagtámman kó katô amo yu katô ándà yu kalumu tingód katô kabánnal yu katô Manama, nángngà ni tun ta saruwan din. ²⁰Atin ka tiisán yu tô supak tingód katô linumuwan yu na madat, ándà ágpulusán yu. Asal ka tiisán yu tô kahirapan agad madigárrù tô linumuwan yu, durungán kó katô Manama, ²¹su tô gó igtawar kó katô Manama. Si Cristo tô iringan yu, su ihirapan gó pagsik sikandin para ákníyu. Tákkás kó kandin. ²²Ándà sikandin ikasalà, asta ándà sikandin bulaló.ⁱ ²³Agad duwán igbuyas-buyas kandin, asal ándà sikandin sulì buyas. Agad igirrayatan sikandin, ándà sikandin bantà kandan, asal igsarigan din tô Manama na nángngà ágruud. ²⁴Igpid din tô mga salà ta tun ta krus ukit katô lawa din ébô paluwaán ki tikud tun ta salà, asta ébô manté ki na nángngà tun ta saruwan din. Ukit katô mga amù tun ta lawa din, inólian kòd. ²⁵Agad igpanó-panó kó iring na mga karnero na itadin, asal áknganni iglónód kòd tun ta Taradóppón asta Taratómmóng ákníyu.^j

Katinurù tingód katô taladuma

3 ¹Iring pagsik kani tô áglumun yu na mga sawa, su kailangan mánnal kó katô ákníyu mga дума agad dì dan ágbánnal katô kagi ka Manama. Agad dì kó kumagi kandan, ka kitanán dan tô madigár ágkémun yu, mapid dan mamaké ki Jesu-Cristo. ²Mapid dan ukit ka kasállág dan katô madigár ágkémun yu na matullid asta karespeto yu. ³Tô kapiyà-piyà yu ánnà dád tô tun ta luwà ka lawa yu, iring na katémmós ka ulu, asta kagamit katô mga bulawan ó mga kapa na dakál é lagà. ⁴Asal tô kapiyà-piyà yu tô tun ta dalám yu. Kailangan masunay asta madigár tô ágkémun tikud tun ta pusung yu na dì ágkapalin, su ni gó tô duwán dakál é lagà tun ta saruwan katô Manama. ⁵Su iring kani igpapiyà-piyà tô mga gabayi sayyan na igsarig tun ta Manama, asta igrespeto katô kandan mga дума. ⁶Iring kani si Sara na igbánnal ki Abraham asta igtawar din na “Sir.” Na, sikiyu tô inému dán iring ki Sara su áglumu kó katô madigár asta ágpakita kó na ándà máddang yu.

ⁱ 2:22 Ahaán tô Isaias 53:9 ^j 2:24-25 Ahaán tô Isaias 53:5-6

⁷Na, sikiyu pagsik na mga gamama, kailangan madigár tō áglumun yu tun ta ákniyu mga sawa iring katō isóddóran yu tingód katō kakalyag ka Manama. Kailangan pabantugán yu sikandan. Agad malómét tō bayi ka tandingán katō mama, asal tō taladuma tō makatanggap ka kantayan na ándà ágtamanán na ágbággén katō Manama. Lumu yu ni ébò di kadalangan tō kadasal yu.

Katiis tun ta kahirapan

⁸Nit katapuriyan, pasábbadé kó tun ta panámdám. Riyu kó katō ágriyun katō duma mga manubù. Paginawaé kó na mga kataladi. Pédu-éduwé kó. Pabbabà-babà kó. ⁹Atin ka duwán áglumu ka madat tun ákniyu, yakó ágsulì áglumu ka madat. Atin ka ágbuyasán kó, yakó ágsulì ágbuyas, asal sulii yu baling ka madigár, su tō gó tō kakalyag katō Manama ákniyu, asta bággayan kó ikandin ka kadigárran. ¹⁰Su mà katō kagi ka Manama na igsulat,

“Atin ka malyag kó na kadayawan asta madigár tō kóddò yu, yakó ágkagi ka madat, asta yakó ágbulaló.

¹¹Tayyug kó katō madat lumu, asta lumu yu tō madigár.

Ággár-ággár kó pamasak katō kasunayan.

¹²Ágtómmóngan katō Áglangngagán tō mga áglumu ka madigár, asta ágpaminággán din tō mga dasalán dan.

Asal ágtayyugan din tō mga áglumu ka madat.”^k

¹³Atin ka tuu kó malyag áglumu ka madigár, ándà dumadat ákniyu.

¹⁴Agad girrayatan kó tingód katō kalumu yu ka madigár, duwán ágpulusán na bággén ka Manama ákniyu. Purisu yakó ágkamáddangan, asta yakó ágkasarukur. ¹⁵Asal kailangan pabantugán yu baling si Cristo na bállal Áglangngagán yu. Taganà kó inalayun ébò makataba kó katō minsà tingód katō gimanan yu. Asal piyai yu tō kataba na duwán respeto.

¹⁶Kailangan malinis tō panámdám yu ébò ka buyasán tō madigár ágkémun yu tingód katō katákkás yu ki Cristo, kayyaan tō mga ágbuyas ukit katō ágkagin dan. ¹⁷Su atin ka kakalyag ka Manama na irrayatan kó, tō kérrayat ákniyu tingód katō kalumu yu ka madigár tuu pa madigár ka tandingán katō kérrayat ákniyu tingód katō kalumu yu ka madat.

¹⁸Ihirapan pagsik si Cristo tingód katō áknita salà asta makasábbad dád sikandin inaté. Agad ándà palang salà din, asal inaté sikandin para bullas áknita na masalà-salà ébò piddán ki ikandin tun ta Manama. Agad igmatayan tō lawa din, asal inaté gó puman sikandin ukit ka katulusan katō Ugis Espiritu. ¹⁹Igsadun tō gimukud din tun ta góddóan katō mga gimukud na igpriso, asta igulit-ulit sikandin kandan. ²⁰Tō gó tō ándà bállal katō Manama sayyan tō manté pa si Noe na igimu ka arka.

^k 3:10-12 Salmo 34:12-16

Agad mallayat tô ginawa katô Manama na gangat katô mga manubù ka rumákkád dan katô mga salà, asal ándà dan gó rákkád. Délák dád su duwán dád walu mga manubù na igahu tun ta arka i Noe asta ándà kamaté ukit katô lunup.¹ ²¹Na, tô lunup tô panunggiringan tingód katô kabunyag, su tô igpabunyag kó, itábbus kód ukit katô katulusan na iganté puman ki Jesu-Cristo. Itábbus kó ánnà ukit katô kóras ka buring tun ta lawa yu, asal ukit katô tandô yu katô Manama na igrákkáddan yud tô salà. ²²Igsadun dán si Jesus tun ta langit. Dutun dán sikandin dadan ta kawanan katô Manama. Ágpangulu sikandin katô mga panaligan asta katô langun na duwán katulusan tun datas ta langit.

Mantu kantayan

4 ¹Purisu su ikatiis si Cristo katô kahirapan, kailangan makataganà kó tumiis katô kahirapan na dumunggù tun ákniyu, su sikiyu na ágtiis katô kahirapan, igsugban kód áglumu ka salà, ²ébô róggun manté kó pa, dì yu tumanán tô kakalyag ka lawa yu, asal tumanán yu tô kakalyag ka Manama. ³Su sobra dán tô igulaan yu dángngan iring katô kóddô ka mga dì ágpamaké na ipánnuan katô kadattan, áglumu ka madat, ágkalasing, áglólóban asta áglumu ka madat ukit katô kapangadap dan katô mga ágmanaman. ⁴Asal áknganni tô mga dì ágpamaké ágkasalábbuan ákniyu su dì kód gapil kandan tun ta madat mga áglumun dan. Purisu ágbuyasán kó ikandan. ⁵Asal tumubang dan tun ta Manama na rumuud katô langun, agad tô mga manté ó tô mga inaté. ⁶Tô gó igulit-ulit pagsik tô Madigár Gulitán tun ta mga manubù na inaté dán. Su agad inaté tô lawa dan magunawa katô dungguán ka mga manubù,^m asal manté gó tô espiritu dan iring na manté Manama.

Gasa na igbággé ka Manama

⁷Masig dán dumunggù tô kapángngaan kani langun. Purisu pasunnad kó asta bantayi yu tô ákniyu sarili ébô makapanayun kó dumasal. ⁸Tô tuu ágkailanganán ka langun, panayun kó paginawaé, su atin ka ágginawa tô manubù, makapasinsiya sikandin katô marapung mga salà na ilmu katô duma manubù. ⁹Kailangan palit-alité kó tun ta ákniyu góddóan, asta yakó ágburáng-buráng. ¹⁰Na, tô tagsábbad-sábbad ákniyu igbággayan ka Manama ka gasa ébô patabangé kó. Gamit yu ka madigár tô mga igbággé din ukit ka kédu din. ¹¹Tô igbággayan ka gasa ka kólit-ólit kailangan mulit-ulit katô ágpólitan ka Manama kandin. Tô igbággayan ka gasa na ágtabang kailangan tumabang ukit katô kabákkárran na ágbággén ka Manama. Tuman yu ni ébô agad ándin

¹ 3:20 Ahaán tô Genesis kapitulo 6 sippang ka kapitulo 8. ^m 4:6 Su ikasalà si Adan asta si Eva, igruudan katô Manama na maté dan. Ahaán tô Genesis 3:17-19

tô áglumun yu, Manama tô madurung ukit ki Jesu-Cristo. Mólà pa ka durungán asta mangulu sikandin ka ándà ágtamanán. Matuman ni.

Katiis katô mga ágpampamaké

¹² Sikiyu na ágginawaan ku, yakó ágkasalábbuan tingód katô mga mappait kahirapan na ágdunggù ákniyu. Yakó ágpanámdám na sikiyu dád tô igdungguan kani, su ágdunggù ni ébô kinnaman ka masarig tô kapamaké yu. ¹³ Asal kadayawan kó su inapil kó tun ta kérrayat ki Cristo ébô kadayawan kó pagsik tun ta álló na pakitanán tô séllaán ka bantug din tun ta kalónód din. ¹⁴ Atin ka ágpayayyaán kó tingód katô kapasábbad yu tun ki Cristo, kadayawan kó su ágpasóddór ni na dutun dán ákniyu tô matulus Espiritu ka Manama. ¹⁵ Atin ka irrayatan kó, di mému ka guné katô kamaté ka manubù, ó katakó, ó kalapas ka sugù, ó kélabut katô duma mga manubù. ¹⁶ Asal ka girrayatan kó tingód katô kapamaké yu ki Cristo, yakó ágkayyaan. Durung yu baling tô Manama, su sikiyu tô mga sakup din.

¹⁷ Igtigkané dán tô timpo na ruudan ka Manama tô mga manubù, asta tô mga gabatà ka Manama tô una ruudan din ukit katô kérrayat asta kahirapan. Atin ka sikita na mga ágpampamaké tô unan din ruudan, tuu pa makamáddang tô karuud din katô mga di ágbánnal katô Madigár Gulitán na tikud tun ta Manama. ¹⁸ Mà katô kagi ka Manama na igsulat, “Atin ka mahirap tô katábbus katô mga manubù na nángngà tun ta saruwan ka Manama, mamánnu tô mga ándà bánnal katô Manama asta tô mga masalà-salà?”ⁿ

¹⁹ Purisu atin ka girrayatan kó tingód ka kakalyag ka Manama, panayun kó lumu ka madigár, asta sarig kó tun ta Manama na igimu ákniyu, su ágkasarigan sikandin.

Nángngà áglumun katô mga tarapid ka simbaan

5 ¹ Na, duwán kagin ku ákniyu na mga tarapid ka simbaan. Sakán pagsik tô sábbad tarapid duma ákniyu, asta ikatestigossa katô mga kérrayat na inókitan i Cristo, asta mapilla katô séllaán ka bantug din na pakitanán din. Ágpédu-éduwa ákniyu na ² dóppóni yu tô mga manubù na igsarig katô Manama ákniyu, su iring dan na mga karnero, asta sikiyu tô iring na taradóppón. Dóppóni yu sikandan ánnà su igpirit kó, asal ukit katô kakalyag yu, su tô gó tô kakalyag ka Manama. Lumu yu ni ánnà ébô manalapì kó, asal su tuu kó malyag lumumu. ³ Yakó ágpallayat-layat katô mga manubù na igsarig ka Manama ákniyu ébô dóppónan yu, asal pakita yu kandan na sikiyu tô madigár giringanan dan. ⁴ Na, ka lumónód dán tô

ⁿ 4:18 Panultihon 11:31

Pangulu katô mga taradóppón, makatanggap kó katô korona na ágsélla na di mandà tò kadigárran.

⁵Sikiyu pagsik na mga adi dád, kailangan rumespeto kó katô mga tarapid ka simbaan, asta tò langun yu, pabbabà kó katô kamanubuan yu asta patabangé kó, su mà katô kagi ka Manama na igsulat,

“Sapadan katô Manama tò ágpdadurung.

Asal ágkéduwan din tò ágpabbabà.”^o

⁶Purisu pabbabà kó tun ta matulus Manama ébô pallayatán kó ikandin tun ta nángngà timpo. ⁷Bággé yu kandin tò langun ágkasasówan yu, su ágdóppón sikandin ákniyu.

⁸Pasunnad kó asta banté kó, su tò usig yu na si Maibuyan ágpanó-panó iring na liyun na ginigár asta ágpamasak katô dawin din. ⁹Atuwi yu sikandin ukit katô masarig kapamaké yu, su ikasóddór kó na tò langun kataladi yu tun ta kapamaké nit kaluwagan kani banuwa ágkinnaman pagsik katô kérrayat na magunawa katô inókitan yu. ¹⁰Asal tingód katô kédu ka Manama, igtawar kó ikandin ukit ki Cristo ébô mapil kó tun ta séllaán din na ándà ágtamanán. Pángnga irrayatan kó tun ta mabbabà timpo, Manama tò pamantu, pasarig, asta pabákkár ákniyu, asta sumánnar ákniyu tun ta pónsadan na di ágkakálláng. ¹¹Sikandin tò matulus na mangulu sippang ka ándà ágtamanán! Matuman ni.

Ágtamanán kani sulat

¹²Igsulatta ákniyu kani mabbabà sulat na igtabangan i Silvano.^p Tun ta panámdám ku, sikandin tò ágkasarigan kataladi ta. Igsulat ku ákniyu ébô pabákkárrán tò kapamaké yu asta ébô pasóddórán kó na bánnal gó tò kédu ka Manama. Purisu yakó ágsuwé tikud tun ta kédu din.

¹³Tò mga kataladi yu tun ta Babilonia^q na igsalin pagsik katô Manama, ágpangumusta dan ákniyu, asta ágpangumusta si Marcos na batà ku tun ta kapamaké. ¹⁴Papangumustaé kó langun yu na ágpampamaké, su tò gó tò kakilalaan na ágpaginawaé kó.

Mólà pa ka duwán kasunayan katô langun yu na igpasakup ki Cristo.

^o 5:5 Mga Panultihon 3:34. ^p 5:12 Silvano, ó Silas. ^q 5:13 Tò mga kataladi yu tun ta Babilonia, ó tò bayi tun ta Babilonia. Ni bayi ni tò mga ágpampamaké. Babilonia tò pagngadan dan katô lunsud ka Roma, su tò madat áglumun dutun iring katô madat iglumu tun ta Babilonia sayyan. Ahaán tò Daniel kapitulo 5 asta tò Igpakita kapitulo 17 asta 18